

Storia di una nuvoletta e di un piccolo bambino...

Un pensiero per Natale 2020

Quasi tremila ani fa, da adesso
e novesento prima de Gesù,
in tera d'Israele
gh'era na gran suta...
Da tri ani no piovea,
le bestie moriva
e i omeni pativa...
I falsi profeti del dio Baal
I bacajava verso el ciel
ma l'acqua no vegnea...
Alora rivò Elia el profeta
e dal Carmelo,
monte come un balcon
afazado verso el mar...
el se mete a pregàr...
"Vedito gnente dal mar?"
Gnente!..."
Ma dopo sete olte
sente dir "me pàr che
na nuvoletta picinina
dela grandessa de na man
la vien su dal mar..."
Elia siga: "dighe al re ch'el parta
che fra poco piovarà..."
Fu cussì che a partir
da quella nuvoletta

con altre nuvole ingrossà
dopo tri ani el Signor
l'ha fato finir la suta...
Penso che el Santo Butin
sia come quella nuvoletta
massa picinin
pàr farse édar ben...
i l'ha vedù sol quattro pastori,
tri magi vegnudi da l'oriente,
na stela nel ciel,
do bestie nela stala
che scaldarà el Santo Butin
e farà compagnia
a Maria che lo latava
e al bon Bepin che traficava
pàr fàr bela la stala...
Come la nuvoletta
che portò via la suta
quel Butin picinin
tribulando e morendo
In crosse come m'asasin,
vegnendo fora vivo
da quel sepolcro infame
l'ha rifato e rifarà
la storia de l'umanità!
Sempre e anca adesso

che vivemo fra disgrassie,
fame, guere, odio
e brute pandemie...
ricordemose de tornàr butini
come la nuvoletta picinina
che portò la salvessa...
Nel nome del Santo Butin
lassemo stàr
de tirar fora storie strambe
volemo el ben
e volemosse più ben...
Come in quella note, ricordito?
a Betleme di Giudea
con Maria e Giusepe
dove nàsea un Butin
pitoco e santo,
picinin... Dio...
Dio che soride,
e dopo tanti ani
ne soride ancora
e ne vol ben,
e gnente tien in memoria
gnanca se ricorda
dai malani che nela storia
gh'emo combinà...

Arturo

